



Sabtu, 28 Desember 2024
Ogen: Johanes 15:5-8



Buah Guna Kalak Sideban



Lit dua makna perumpaman pokok anggur si ituriken Jesus. Igambarkan Jesus maka diriNa me batang anggur e. Ajar-ajar e dahan-dahanna. Adi dahan e la leket ku batang, dahan e la banci turah sabap naka/pangan dahan e rehna i bas batang e nari. Adi dahan e la ndataken gizi si cukup, tentu la mejile perturahna, kerah dungna i tektek, i tama ku bas api. Kernep la kai pe gunana. Enda sada gambaren, Jesus e me ulu kegeluhen. La lit kesirangennta (ajar-ajar) ras Jesus. Adi kita la leket ku bas diri Jesus e la kita ndatken kegeluhen. Ersada kita ras Jesus desken prangko leket ku bas surat. Persadanta ras Jesus e erbahansa kita megegeh ras banci erbuah. Jesus me ulu pangan si mereken kegeluhen. Adi la kita leket ras Jesus e murah kita kote, kelsehen, la semangat erkiteken la lit asupen pangan si mereken gegeh man banta. Dungna la kita ngasup ngukuri ras ngelakoken si mehuli. Enda me makna si pemena, lit unsur persadan (koinonia), ersada ras Jesus erbahansa kita ngasup ersada ras teman sada perpulungen.

Makna si peduaken, adi leket ras Jesus e, kita ndatken pangan/gizi si cukup, seh maka kita banci erbuah, meramis buahna ras entebu. Buah si entebu e ertina perbahanen si mehuli si banci inanami sekelewetta. Biasana pe buah si entebu labo batang si ngenanamisa tapi kalak si isekelewetna.

Pelajaren man banta, adi ersada kita ras Jesus kita ngaloken gegeh si mbaru tiap wari, seh maka ngasup kita ngukuri ras ngelakoken perbahanen si mehuli si erguna ras ernanam man sekelewetta; mereken ngaruh si mehuli kap. Reh gegehna persadanta ras Jesus, reh meramisna buah si mehuli i bas kita nari.

☞ *Tetaplah leket ku batang*